

CYNLLUN CODI TALIADAU I AWDURDODAU LLEOL

Cynllun Trwyddedau Awdurdodau Lleol ar gyfer Gweithfeydd Rhan A(2) a Pheiriannau Llosgi Gwastraff Bach (Ffioedd a Thaliadau) (Cymru) 2026

CYNNWYS

RHAN 1

Cyflwyniad

1. Enwi, dod i rym a chymhwyso
2. Dehongli
3. Gweithgareddau cyfunol
4. Derbynnnydd ffioedd

RHAN 2

Ffioedd a chostau hysbysebu mewn perthynas â cheisiadau am drwyddedau

5. Y ffi am gais am roi trwydded
6. Y ffi am gais am amrywio trwydded
7. Y ffi am gais am drosglwyddo trwydded
8. Y ffi am gais am ildio trwydded
9. Ad-dalu costau hysbysebu

RHAN 3

Taliadau parhau

10. Talu'r tâl parhau
11. Swm y tâl parhau
12. Amseriad talu'r tâl parhau
13. Talu'r tâl parhau mewn cysylltiad â'r flwyddyn y rhoddir y drwydded ynddi
14. Y tâl am dalu'n hwyr

RHAN 4

Ad-dalu ffioedd a thaliadau parhau

15. Ad-dalu'r ffi am gais am roi trwydded
16. Ad-dalu'r ffi am gais am amrywio trwydded
17. Ad-dalu'r tâl parhau
18. Ad-daliadau eraill
19. Dirymu

Mae Gweinidogion Cymru yn gwneud y Cynllun hwn drwy arfer y pwerau a roddir gan reoliad 66(1) o Reoliadau Trwyddedu Amgylcheddol (Cymru a Lloegr) 2016(1).

RHAN 1

Cyflwyniad

Enwi, dod i rym a chymhwyso

1.—(1) Enw'r Cynllun hwn yw Cynllun Trwyddedau Awdurdodau Lleol ar gyfer Gweithfeydd Rhan A(2) a Pheiriannau Llosgi Gwastraff Bach (Ffioedd a Thaliadau) (Cymru) 2026 a daw i rym ar [XXX].

(2) Mae'r Cynllun hwn yn gymwys o ran Cymru.

Dehongli

2.—(1) Yn y Cynllun hwn—

ystyr “awdurdod lleol” (“*local authority*”) yw cyngor sir neu gyngor bwrdeistref sirol yng Nghymru;

ystyr “blwyddyn ariannol” (“*financial year*”) yw blwyddyn sy'n dod i ben â 31 Mawrth;

ystyr “Cyfoeth Naturiol Cymru” (“*Natural Resources Wales*”) yw Corff Adnoddau Naturiol Cymru;

ystyr “Rheoliad CE 2006” (“*the 2006 EC Regulation*”) yw Rheoliad (EC) Rhif 166/2006 Senedd Ewrop a'r Cyngor a wnaed ar 18 Ionawr 2006 ynglŷn â sefydlu Cofrestr Ewropeaidd ynghylch Gollwng a Throsglwyddo Llygryddion(2);

ystyr “Rheoliadau 2016” (“*the 2016 Regulations*”) yw Rheoliadau Trwyddedu Amgylcheddol (Cymru a Lloegr) 2016;

ystyr “trwydded” (“*permit*”) yw trwydded amgylcheddol a roddir gan awdurdod lleol o dan reoliad 13 o Reoliadau 2016 ac, oni nodir yn wahanol, mae'n drwydded sy'n awdurdodi gweithredu gweithfa Rhan A(2) neu beiriant llosgi gwastraff bach.

(2) Mae i ymadroddion Cymraeg yn y Cynllun hwn, gan gynnwys “gweithfa Rhan A(2)” (“*Part A(2) installation*”), “gweithgaredd allyrru toddyddion” (“*solvent emission activity*”), “gweithgaredd Rhan A(2)” (“*Part A(2) activity*”), “gweithgaredd Rhan B” (“*Part B activity*”), “gweithredwr” (“*operator*”) a “peiriant llosgi gwastraff bach” (“*small waste incineration plant*”) yr ystyron a roddir i'r ymadroddion cyfatebol Saesneg yn rheoliad 2(1) o Reoliadau 2016.

Gweithgareddau cyfunol

3. Mae'r canlynol i'w trin fel un gweithgaredd Rhan A(2) at ddibenion y Cynllun hwn—

- (a) gweithgareddau Rhan A(2) sy'n dod o fewn yr un Adran o Ran 2 o Atodlen 1 i Reoliadau 2016 sy'n cael eu cynnal, neu a fydd yn cael eu cynnal, yn yr un weithfa Rhan A(2);
- (b) un neu ragor o weithgareddau Rhan A(2) ac un neu ragor o weithgareddau Rhan B sy'n dod o fewn yr un Adran o Ran 2 o Atodlen 1 i Reoliadau 2016 sy'n cael eu cynnal, neu a fydd yn cael eu cynnal, yn yr un weithfa Rhan A(2).

Derbynydd ffioedd

4. Pan fo gweithredwr yn gwneud cais mewn cysylltiad â thrwydded o dan Reoliadau 2016, rhaid i'r gweithredwr gyflwyno'r ffioedd a'r taliadau sy'n daladwy o dan y Cynllun hwn i'r awdurdod lleol y mae'r weithfa Rhan A(2) neu'r peiriant llosgi gwastraff bach yn cael ei gweithredu neu ei weithredu yn ei ardal, neu y bydd yn cael ei gweithredu neu ei weithredu yn ei ardal.

(1) O.S. 2016/1154, fel y'i diwygiwyd.

(2) EUR 2006/166, fel y'i diwygiwyd.

RHAN 2

Ffioedd a chostau hysbysebu mewn perthynas â cheisiadau am drwyddedau

Y ffi am gais am roi trwydded

5.—(1) Y ffi am gais am roi trwydded yw—

- (a) yn achos trwydded i weithredu gweithfa Rhan A(2), cyfanswm—
 - (i) £4,788 am bob gweithgaredd Rhan A(2) sydd i'w gynnal yn y weithfa Rhan A(2), a
 - (ii) y ffioedd sy'n daladwy am bob gweithgaredd Rhan B(1) (ac eithrio gweithredu peiriant llosgi gwastraff bach) a phob gweithgaredd allyrru toddyddion, os oes un, sydd i'w gynnal yn y weithfa;
- (b) yn achos trwydded i weithredu peiriant llosgi gwastraff bach, cyfanswm—
 - (i) £4,788 am bob peiriant llosgi gwastraff bach, a
 - (ii) y ffioedd sy'n daladwy am bob gweithgaredd Rhan B(2) (ac eithrio gweithredu peiriant llosgi gwastraff bach) a phob gweithgaredd allyrru toddyddion, os oes un, sydd i'w gynnal yn y peiriant llosgi gwastraff bach.

Y ffi am gais am amrywio trwydded

6.—(1) Y ffi am gais am amrywio trwydded o dan reoliad 20 o Reoliadau 2016 yw £1,948.

(2) Ond os yw'r awdurdod lleol yn ystyried y bydd cais o dan reoliad 20 o Reoliadau 2016, os caiff ei ganiatáu—

- (a) yn awdurdodi newid yng ngweithrediad gweithfa Rhan A(2), sydd ynddo'i hun yn bodloni unrhyw un neu ragor o'r trothwyon a bennir ar gyfer gweithgaredd Rhan A(2), neu
- (b) yn awdurdodi newid yng ngweithrediad peiriant llosgi gwastraff bach, sydd ynddo'i hun yn bodloni unrhyw un neu ragor o'r trothwyon a bennir ar gyfer peiriant llosgi gwastraff bach,

y ffi yw £4,788.

Y ffi am gais am drosglwyddo trwydded

7. Y ffi am gais am drosglwyddo trwydded o'r gweithredwr i berson arall yw—

- (a) £336 am drosglwyddo'n gyfan gwbl;
- (b) £994 am drosglwyddo'n rhannol.

Y ffi am gais am ildio trwydded

8. Y ffi am gais am ildio trwydded, yn gyfan gwbl neu'n rhannol, yw £994.

Ad-dalu costau hysbysebu

9. Rhaid i weithredwr sydd wedi gwneud cais mewn cysylltiad â thrwydded o dan Reoliadau 2016, yn dilyn cais gan yr awdurdod lleol, ad-dalu i'r awdurdod lleol unrhyw gostau yr aed iddynt gan yr awdurdod lleol wrth hysbysebu'r cais er mwyn rhoi gwybod i'r ymgynghoreion cyhoeddus am y cais o dan baragraff 6(1)(a) o Ran 1 o Atodlen 5 i Reoliadau 2016.

-
- (1) Rhaid cyfrifo'r ffioedd sy'n daladwy am unrhyw weithgaredd Rhan B (ac eithrio gweithredu peiriant llosgi gwastraff bach) neu unrhyw weithgaredd allyrru toddyddion sydd i'w gynnal yn y weithfa Rhan A(2) neu'r peiriant llosgi gwastraff bach yn unol ag erthyglau 5 a 7 o Gynllun Trwyddedau Awdurdodau Lleol ar gyfer Gweithfeydd a Pheiriannau Symudol Rhan B a Gweithgareddau Allyrru Toddiddion (Ffioedd a Thaliadau) (Cymru) 2025.
 - (2) Gweler troednodyn (1).

RHAN 3

Taliadau parhau

Talu'r tâl parhau

10.—(1) Rhaid i weithredwr gweithfa Rhan A(2) neu beiriant llosgi gwastraff bach dalu tâl blynyddol i'r awdurdod lleol y mae'r weithfa Rhan A(2) neu'r peiriant llosgi gwastraff bach yn cael ei gweithredu neu ei weithredu yn ei ardal, neu y bydd yn cael ei gweithredu neu ei weithredu yn ei ardal, mewn cysylltiad â pharhau pob trwydded a ddelir gan y gweithredwr (y "tâl parhau").

(2) Mae'r tâl parhau i'w dalu'n llawn er gwaethaf—

- (a) atal dros dro neu ddiweddu yn rhannol neu'n gyfan gwbl unrhyw weithgaredd Rhan A(2) yn y weithfa Rhan A(2) y mae'r drwydded yn ymwneud â hi yn ystod y flwyddyn ariannol y mae'r tâl blynyddol yn ymwneud â hi, neu
- (b) atal dros dro neu ddiweddu yn rhannol neu'n gyfan gwbl weithrediad y peiriant llosgi gwastraff bach y mae'r drwydded yn ymwneud ag ef yn ystod y flwyddyn ariannol y mae'r tâl blynyddol yn ymwneud â hi.

Swm y tâl parhau

11.—(1) Y tâl parhau mewn cysylltiad â phob trwydded yw cyfanswm—

- (a) y taliadau am bob gweithgaredd Rhan A(2) neu beiriant llosgi gwastraff bach a awdurdodir gan y drwydded, fel y'u nodir yn Nhabl 1, pan fo "ymdrech reoleiddiol isel", "ymdrech reoleiddiol ganolog" ac "ymdrech reoleiddiol uchel" yn gategorïau sydd wedi eu pennu yn unol â'r fethodoleg a nodir yn y ddogfen "LAPPC Risk Method March 2009 (revised July 2013)",

Tabl 1

<i>Gweithgaredd Rhan A(2) neu beiriant llosgi gwastraff bach a awdurdodir</i>	<i>Tâl</i>
Pob gweithgaredd Rhan A(2) neu beiriant llosgi gwastraff bach ymdrech reoleiddiol isel	£1,910
Pob gweithgaredd Rhan A(2) neu beiriant llosgi gwastraff bach ymdrech reoleiddiol ganolog	£2,144
Pob gweithgaredd Rhan A(2) neu beiriant llosgi gwastraff bach ymdrech reoleiddiol uchel	£3,177

- (b) y taliadau am bob gweithgaredd Rhan B(1) (ac eithrio gweithredu peiriant llosgi gwastraff bach) a phob gweithgaredd allyrru toddyddion (os oes un) o dan baragraff (2), ac

- (c) £147, pan fo'r gweithredwr yn cynnal gweithrediad sy'n dod o fewn rhwymedigaethau adrodd Rheoliad CE 2006, mewn cysylltiad ag unrhyw gostau yr eir iddynt gan yr awdurdod lleol megis costau casglu, gwirio sicrwydd ansawdd a phrosesu'r data yr adroddir amdanynt ar lygryddion a throsglwyddiadau gwastraff sy'n digwydd oddi ar y safle.

(2) Os yw gweithredwr wedi talu tâl parhau am weithgaredd Rhan B sydd wedi dod yn weithgaredd Rhan A(2), a bod y gweithgaredd hwnnw'n cael ei gynnal mewn gweithfa Rhan A(2)—

- (a) rhaid i unrhyw swm a delir mewn cysylltiad â'r gweithgaredd Rhan B fel rhan o'r tâl parhau gael ei ddidynnu o'r tâl parhau ar sail pro rata, a gyfrifir o ddyddiad dyroddi'r drwydded hyd at ddiwedd y flwyddyn ariannol;

(1) Rhaid cyfrifo'r taliadau sy'n daladwy am unrhyw weithgaredd Rhan B (ac eithrio gweithredu peiriant llosgi gwastraff bach) neu unrhyw weithgaredd allyrru toddyddion sydd i'w gynnal yn y weithfa Rhan A(2) neu'r peiriant llosgi gwastraff bach yn unol ag erthygl 14 o Gynllun Trwyddedau Awdurdodau Lleol ar gyfer Gweithfeydd a Pheiriannau Symudol Rhan B a Gweithgareddau Allyrru Toddiddion (Ffioedd a Thaliadau) (Cymru) 2025.

- (b) mae unrhyw randaliad sy'n ddyledus mewn cysylltiad â'r gweithgaredd Rhan B ar y dyddiad y dyroddir y drwydded Rhan A(2) yn peidio â bod yn daladwy;
- (c) mae'r tâl parhau newydd, ar ôl cymhwyso unrhyw ddiidyniadau pro rata o dan baragraff (a), yn daladwy yn unol ag erthygl 13(2).

Amseriad talu'r tâl parhau

12.—(1) Yn ddarostyngedig i erthyglau 13 a 14, mae tâl parhau yn daladwy—

- (a) yn llawn erbyn 1 Ebrill yn y flwyddyn ariannol y delir y drwydded ynddi, neu
- (b) mewn pedwar rhandaliad cyfartal erbyn 1 Ebrill, 1 Gorffennaf, 1 Hydref ac 1 Ionawr yn y flwyddyn ariannol honno.

(2) Os telir tâl parhau mewn rhandaliadau, bydd cynnydd o £53 yng nghyfanswm y tâl parhau sy'n daladwy yn y flwyddyn ariannol honno.

Talu'r tâl parhau mewn cysylltiad â'r flwyddyn y rhoddir y drwydded ynddi

13.—(1) Yn y flwyddyn ariannol y rhoddir trwydded ynddi, mae'r tâl parhau mewn cysylltiad â'r drwydded honno'n daladwy—

- (a) yn llawn ar y dyddiad y rhoddir y drwydded, neu
- (b) mewn rhandaliadau cyfartal erbyn 1 Ebrill, 1 Gorffennaf, 1 Hydref ac 1 Ionawr yn y flwyddyn ariannol honno.

(2) Cyfrifir swm y tâl parhau sy'n daladwy yn y flwyddyn ariannol y rhoddir y drwydded ynddi drwy luosi nifer y misoedd calendr cyflawn sy'n weddill yn y flwyddyn ariannol honno ar y dyddiad y rhoddir y drwydded ag un rhan o ddeuddeg o'r tâl parhau blyneddol, fel y'i nodir yn erthygl 11.

(3) Os telir tâl parhau mewn cysylltiad â'r flwyddyn ariannol y rhoddir trwydded ynddi mewn rhandaliadau, bydd cynnydd o £53 yng nghyfanswm y tâl parhau sy'n daladwy yn y flwyddyn ariannol honno.

Y tâl am dalu'n hwyr

14. Pan—

- (a) bo awdurdod lleol wedi dyroddi anfoneb i weithredwr am dalu tâl parhau neu randaliad o dâl parhau, a
- (b) na fo'r taliad o'r tâl parhau, neu randaliad o'r tâl parhau, yn dod i law o fewn wyth wythnos sy'n dechrau â dyddiad yr anfoneb,

rhaidd i'r gweithredwr dalu tâl o £74 am dalu'n hwyr.

RHAN 4

Ad-dalu ffioedd a thaliadau parhau

Ad-dalu'r ffi am gais am roi trwydded

15.—(1) Rhaid i'r awdurdod lleol, cyn gynted ag y bo'n ymarferol, ad-dalu'n llawn unrhyw ffi am gais a dalwyd o dan erthygl 5 os, cyn i drwydded gael ei rhoi—

- (a) yw Gweinidogion Cymru yn rhoi cyfarwyddyd o dan reoliad 33 o Reoliadau 2016, yn cyfarwyddo Cyfoeth Naturiol Cymru i arfer swyddogaethau'r awdurdod lleol mewn cysylltiad â gweithfeydd Rhan A(2) neu beiriannau llosgi gwastraff bach, neu
- (b) yw'r gweithgaredd y ceisir y drwydded ar ei gyfer—
 - (i) yn peidio â chael ei reoleiddio o dan Reoliadau 2016, neu

- (ii) yn cael ei ailddosbarthu o dan Reoliadau 2016 fel ei fod yn dod o dan reolaeth Cyfoeth Naturiol Cymru.

(2) Pan fo cais am roi trwydded yn ymwneud â mwy nag un gweithgaredd, rhaid talu ad-daliad mewn cysylltiad â phob gweithgaredd sy'n peidio â chael ei reoleiddio o dan Reoliadau 2016 neu sy'n cael ei ailddosbarthu o dan Reoliadau 2016 fel ei fod yn dod o dan reolaeth Cyfoeth Naturiol Cymru.

Ad-dalu'r ffi am gais am amrywio trwydded

16. Rhaid i'r awdurdod lleol, cyn gynted ag y bo'n ymarferol, ad-dalu'n llawn unrhyw ffi am gais a dalwyd o dan erthygl 6 os, cyn i amrywiad gael ei wneud—

- (a) yw Gweinidogion Cymru yn rhoi cyfarwyddyd o dan reoliad 33 o Reoliadau 2016, yn cyfarwyddo Cyfoeth Naturiol Cymru i arfer swyddogaethau'r awdurdod lleol mewn cysylltiad â gweithfeydd Rhan A(2) neu beiriannau llosgi gwastraff bach, neu
- (b) yw'r gweithgaredd Rhan A(2) neu'r peiriant llosgi gwastraff bach a awdurdodir gan y drwydded—
 - (i) yn peidio â chael ei reoleiddio o dan Reoliadau 2016, neu
 - (ii) yn cael ei ailddosbarthu o dan Reoliadau 2016 fel ei fod yn dod o dan reolaeth Cyfoeth Naturiol Cymru.

Ad-dalu'r tâl parhau

17.—(1) Rhaid i'r awdurdod lleol, cyn gynted ag y bo'n ymarferol, ad-dalu tâl parhau a dalwyd gan y gweithredwr o dan Ran 3 os—

- (a) yw Gweinidogion Cymru yn rhoi cyfarwyddyd o dan reoliad 33 o Reoliadau 2016, yn cyfarwyddo Cyfoeth Naturiol Cymru i arfer swyddogaethau'r awdurdod lleol mewn cysylltiad â gweithfeydd Rhan A(2) neu beiriannau llosgi gwastraff bach, neu
- (b) yw'r gweithgaredd Rhan A(2) neu'r peiriant llosgi gwastraff bach a awdurdodir gan y drwydded, y mae tâl parhau wedi ei dalu mewn cysylltiad â hi—
 - (i) yn peidio â chael ei reoleiddio o dan Reoliadau 2016, neu
 - (ii) yn cael ei ailddosbarthu o dan Reoliadau 2016 fel ei fod yn dod o dan reolaeth Cyfoeth Naturiol Cymru.

(2) Pan fo tâl parhau yn cynnwys taliadau am fwy nag un gweithgaredd Rhan A(2) neu beiriant llosgi gwastraff bach, rhaid talu ad-daliad mewn cysylltiad â phob gweithgaredd Rhan A(2) sy'n peidio â chael ei reoleiddio o dan Reoliadau 2016 neu sy'n cael ei ailddosbarthu o dan Reoliadau 2016 fel ei fod yn dod o dan reolaeth Cyfoeth Naturiol Cymru.

(3) Cyfrifir swm yr ad-daliad sy'n daladwy fel a ganlyn—

- (a) cyfanswm y tâl parhau blynyddol llai un rhan o ddeuddeg o gyfanswm y tâl wedi ei luosi â phob mis calendr cyflawn sy'n weddill o 1 Ebrill ym mhob blwyddyn ariannol hyd at y dyddiad perthnasol, neu
- (b) pan delir y tâl parhau mewn rhandaliadau, swm y rhandaliad diweddaraf llai traean o'r swm hwnnw ar gyfer pob mis calendr cyflawn o'r dyddiad yr oedd y rhandaliad hwnnw'n ddyledus hyd at y dyddiad perthnasol.

(4) Mae rhandaliad o'r tâl parhau nad yw wedi dod yn daladwy cyn y dyddiad perthnasol yn peidio â bod yn daladwy.

(5) Yn yr erthygl hon, ystyr y "dyddiad perthnasol" yw'r dyddiad—

- (a) y mae Gweinidogion Cymru yn rhoi cyfarwyddyd o dan reoliad 33 o Reoliadau 2016,
- (b) y mae'r gweithgaredd yn peidio â chael ei reoleiddio o dan Reoliadau 2016, neu
- (c) y mae'r gweithgaredd yn cael ei ailddosbarthu o dan Reoliadau 2016 fel ei fod yn dod o dan reolaeth Cyfoeth Naturiol Cymru.

Ad-daliadau eraill

18. Ni chaiff yr awdurdod lleol ad-dalu unrhyw dâl parhau nac unrhyw ffi ac eithrio yn unol â darpariaethau'r Rhan hon.

Dirymu

19. Mae Cynllun Trwyddedau Awdurdodau Lleol ar gyfer Gweithfeydd Rhan A(2) ac Offer Llosgi Gwastraff Bach (Ffioedd a Thaliadau) (Cymru) 2016 wedi ei ddirymu.